

**Aningaasaqarnermut Ataatsimiititaliap suliaq nr. 01.31.06/08-00332 pillugu sisamangornermi ulloq 22. maj 2008-mi aalajangiinera pillugu Naalakkersuisunut ilisimatitsineq.**

(Naalakkersuisut ulloq 13. maj 2008-mi ataatsimiinneranni imm. 2d)

**Mittarfiit pillugit suliassanut nassuiaatit allangortinneqarnissaat**

Naalakkersuisut **inassutigaa**,

- kontomi pingaarnermi 87.73.22-imi, Mittarfeqarfinni mittarfinnut tunngasumi, suliassamut nr. 120.25.024-imut, Ilulissani mittarfimmut tunngasumut, aamma suliassamut nr. 999.28.016-imut, Illoqarfinni mikinerisuni mittarfeqqanut tunngasumut, nassuiaatit isummernissamut tunngavissiami matumani allassimasutut allangortinneqassasut.

**Aningaasaqarnermut Ataatsimiititaliap oqaaseqaatai**

Manna tikillugu naatsorsuutigisanit illoqarfinni amerlanerusuni mittarfinnik misissuisinnaanerit pillugit misissueqqaarnerit ingerlanneqarsinnaaqullugit sanaartugassatut suliassanut marlunnut nassuiaatit allangortinneqarnissaat suliama matumani Naalakkersuisut qinnutigaat. Tamanna suliassaqaarfimmi sanaartugassatut suliassanut aningaasaliissutaareersut atorlugit ingerlanneqassaaq.

Mittarfinni piffissami aggersumi allilerisinnaaneq pillugu aalajangiinissamut tunngavissat Naalakkersuisunit pitsanngorsarniarneqarmata ataatsimiititaliap ataatsimut isigalugu pitsaasutut isigaa. Tamanna tunngavigalugu qinnuteqaat ataatsimiititaliamit akuersissutigineqarsinnaavoq.

Misissueqqaarnerinnarnullu aningaasanik immikkoortitsisoqarmat erseqqissassallugu ataatsimiititaliap pissutissaqarsoraa. Misissueqqaarnerit taakku illoqarfinni pineqartuni tamani mittarfiliortoqarneranik pingitsoorani kinguneqarnissaat qulakkeerneqarngilaq. Nunatsinni mittarfinnik allanik sanaartortoqassanersoq sanaartornermut inatsimmik akuersissuteqarnermut atatillugu Inatsisartunit aatsaat aalajangiivigineqassaaq. Sanaartornermut inatsisissatut siunnersuutaasussamik suliarinninnermi tunngavissat ilaattut misissuinissaq matumani pineqartoq isigineqarpoq.

Tamatuma saniatigut aningaasaliissutit immikkoortinneqartut misissueqqaarnerit amerlanerit ilaatinneqarnissaannik siunnersuutigineqartunut naammannissaat Naalakkersuisunit qulakkeerneqarsimassasoq ataatsimiititaliamit **tunngavissaatinneqarpoq**. Taamaalillunilu misissueqqaarnermut taakkununga 2008-mi kingusinnerusukkut ilassutitut aningaasaliissuteqartoqarsinnaanngilaq.

**Aningaasaqarnermut Ataatsimiititaliap aalajangiinera**

Siuliani allassimasutut paasinnilluni Naalakkersuisut inassuteqaataat Aningaasaqarnermut Ataatsimiititaliamit **akuersissutigineqarput**.

Inussiarnersumik inuulluaqqusillunga

Augusta Salling

Aningaasaqarnermut Ataatsimiititaliap siulittaasua